

二商尺牘八



五嶽山人尺牘卷之七

沔陽陳文燭玉叔著

報劉實菴戶部書

昨過明公仙署見其扁爲天下第一流夫漢水
無論矣卽河海尚少遜焉乃明公所以自許見
之話言施之行履者足以當之不佞謂西蜀得
明公又錦水岷山之光足託江流不朽矣幸加
飡自愛至尊酒腆貺所以施于賤子者卽長江
難擬也舟人行草草鳴謝

又

江陽承明公渥愛具謝在淮陰舟中高嶢庄壁
帖奉上幸明公梓之或木或石小跋幸明公書
之以前席間齒及故也明公倘留意亦昭代珍
翰非但蜀人之寶也

報同年王竹陽沈文室書

不佞補官西蜀歸自大江泊舟夏口擬入會城
一叩台光稍慰離索兼爲楚國謝明德遠甚而
游子思家榜人戒行遂未得如願乃從晴川閣

上瞻望使旌真如萬里之鵬九苞之鳳隱隱與
黃鵠並奮歸來見里門老稚嘖嘖門下如出一
口又知息壤之夫君山之黎感同漢沔殊爲同
心一快也謹遣一力代致起居之敬惟門下加
餐以迎天眷

報劉右川太守書

三年之間往來江夏不一拜門下私心悵結類
自絕于有道然門下善政風猷得于口碑者飽
沃殊甚今日晴川又昔時潁川渤海也私計榮

簡當在旦夕不省楚人能借寇否

報湯鳳麓憲使書

往承乏蜀中每歲過德里三四次遙望精廬恒切有道之懷南中曾奉手教讀之如面清光近借使車攬轡江鄉謂可就見明公而岐路無緣倍增積想明公穎達明習表著宇內即江漢亦暫借耳侍教左右以慰生平之願當在何時耶不佞再命入蜀分署所臨川北一路青居錦屏之勝宛在目前而民瘼未曉祇增惶愧明公垂念業梓幸推教之當奉以周旋也

報李岷山中丞書

不佞還家觀門下黜賜既賀且曠光溢繩樞門下施于賤子者厚矣秋初入蜀憶昔追隨門下所云門清似水案定如山之考真國士遇我者也敢不以國士報之第川北一路又門下過化之地肯以經試者惠教一二寧非巴蜀父老所引望于仁慈者乎郢上潛陽洪水爲虐城不浸者三板沔尚存其半門下當以䟽入告矣

報吳瀛江宋道源二少府書

江州得會二公殊有淮陽舊游之感乃二公情
好如昔遇我良厚豈昔人所稱賢達素交風雨
霜雪久而不渝者乎太守林公金輝玉潤而司
理于公又一時之雋二公同心追逐名流周旋
于山水之郡此其愉快豈世路所恒有耶珍重
雙壁慰我長飢舟人行卒卒報謝理棹江門一
登廬嶽或有日乎幸二公儲酒以待

報劉鴻陽太守書

鄱胡玉臺之勝甲于洪都而陶侃馬端臨之文
物尚在閭巷明公朱輪出入真山川之幸矣長
安承渥愛無緣一面偶乘友人蕭近之便敢鳴
謝記室蕭子以身爲教而學博行脩朝夕部下
可助明公作人之化者也幸明公善視之淮口
宴花樓之會何日續之臨紙依依

報周耿西太守書

往與吳山人叔嘉爲都亭會慕明公高雅近得
吳山人孝甫南中書道明公素愛汶嶺峨眉千

載而後再驚周益州矣不佞入蜀在秋初與明公有良晤也匆匆報書不具

報徐忠庵憲使書

京中會丁梓州大理寶應會吳曰南秀才道足下守若令善政在目前宛如周旋足下于清風朗月間也丁公有書儀奉上而吳子申意者再敢布諸記曹

報王洪洲學憲書

不佞有西蜀之命方卧家山暑氣如焚門下作

人之化既公且明每一談之涼風四起矣且暑中搖白羽尚多層冰之想門下課士如不及敏速若注射筆端膚寸膏潤全楚矣汚士多貧又值水荒門下具法眼號大手筆幸少寬之揮汗草草不盡

報李本寧叅政書

不佞苦熱抱病而足下手教及之讀大叙佳贊涼風滿坐頓有起色乃知驅瘴鬼愈頭風古人作自不虛耳珍感珍感八月之初弟當入蜀訪

足下面謝恐足下長安北轅或不及渥手耳陳
太史處當致足下書并道雅意

報謝少山別駕書

連日苦暑方憶公家西亭有迎涼草也而手教
遠及解我鬱蒸豈故人真清風耶豐儀拜賜敢
卻雙幣懼其腆也河朔之飲在何日乎幸共圖
之

報龍伯貞司理書

賀足下新命已具啓投次公矣連日暑甚憶百

泉之勝噴玉湧金冷冷欲僊而鸞鳳之聲尚存
嘯臺間足下披襟一登何異與不佞在長安枕
上語耶鮑子保之風流豪爽又客陳州不佞命
其往謁足下一見其人當把臂入林矣幸爲我
垂青焉

又

河洛爲中原勝地而司理公周旋于直指使者
遊壯哉足下僊吏矣次公在江南平反甚多而
足下明德以慎民自不寬公門當益高乎尊夫

三百四十四
卷之七
人將之官遣一力代壽并以為賀東書西行鞅
掌不次

報鍾心瞿憲使書

奉違大教忽十餘年矣中間踪跡不相聞問豈
真衡陽有回雁峯耶春間揚子渡頭知仙舟北
上亟訪之莫得乃知江魚亦難逢矣使旌迢迢
暫借黃鵠不佞苦病不能躬謁一話離索之懷
門下聲華在中秘文教在南服即江漢豈能久
高賢耶謹遣一力代候起居萬惟珍愛以膺殊

寵

報徐太室宗伯書

邸中數月承門下數顧數見尊酒禮遇勤勤懇
懇而引拔之恩施于不報不肖業銘心骨矣扇
頭二詩携之懷袖剡溪雪棹錦城露冕足為山
川增色獨憂分 聖主星聚元方非不肖所敢
當也偶乘小壻龍子入京之便謹此奉候起居
統希台慈垂宥不宣

報陳肅菴學士書

去冬入京遇明公持衡銓管海內人士望見明
公風度者比于神化之丹青而毛玠之公山濤
之識上薄古人至于不佞骯髒明公收之莫逆
二十年矣握手吐衷宛如疇昔不佞私慶以爲
國有明賢稽善好士如恐不及社稷之福蒼赤
之幸不獨一人之感次于骨也不佞履任蜀中
武夷山色時形夢寐明公能一麾不佞慰我長
飢耶偶遣人送小壻龍子北上敬候起居拜相
在即惟明公爲吾道珍重

報楊後山中丞書

門下擁旄坐鎮中原大河嵩少爲之生色憶漕
道先後數人乃開府獨門下談者津津若爲江
淮樹赤幟焉不佞謂門下弘才清節掌邦戎而
典銓管真旦夕事卽河洛難久借矣不佞補官
入蜀岐路甚難倘有前緣得奔走於左右真浮
生之竒邁也門下何以引拔焉偶舍親龍司理
履任之便敬候起居北望禹衡不勝馳戀

報徐惟德憲使書

承足下書貺遠及故人清風一洗炎暑弟坐家
園數月懶已成癖此行恐爲剡溪之棹矣至少
陵云云令人汗愧唐去今千餘年何得兩子美
也益信古人之高耳使還鳴謝弁以近稿二種
請益惟大雅裁之

報陳春宇宗伯書

江上布帆不能候且召還湏臾矣邵子俊善篆
書得二李王筍之遺足下山堂諸扁可一試之
此子乃吳明卿送之不佞欲不佞轉之門下耳
餘惟爲吾道珍攝以膺大拜不宣

報歐茂野憲使書

江沱大溢思走門下一申慰私而暑氣方盛竟
違初想今從京源往矣還家數月習懶成癖方
在玉沙新草堂築釣磯創碧霞元君祠爲終焉
計茲行特剡溪之棹耳公子遠顧驩甚無厭又
承索書副本不佞平生好畜此物副本亦多昨
以經史子集稍稍甲乙一留江閣一藏新舍不
能割愛謹以史漢奉覽餘當圖致記曹也

報丁梓洲太守書

長安驩笑流連者三夕豈惟同袍所稀即浮生
未有也昔人有言不讀萬卷書不行萬里路非
夫也雄篇日益幸一寄我承許竒石幸致之武
陵比于鬱林之蕪可也儀周兄酒盃爲我促之
偶乘舍親之便附候起居關河阻脩寤寐通之
臨紙依依

報劉鳳坪中丞書

往年郎中叨以世誼極承明公之愛後承乏川

中愧無寸補乃明公優容不加譴斥得無推老
師之愛以愛之乎明公持節萬里符采彪炳增
重博南第廟堂虛席文簡公之相業賴門下有
託焉即昆池蒼山間不能久使旌也不佞再叨
入蜀豈青城赤甲尚以故吏見愛如明公之倦
倦引掖者乎偶乘舍親趙州張守之官之便敬
候起居張守幸明公以通家善視之

報崔又泉侍御書

不佞叨附嘉會奔走西南既二十年矣獨于門

三國志卷之七
下淮揚之政心服口誦以爲門下真御史赤囊
風遠白簡霜清韓山孔臺之間俱爲搖動古人
司過肅繩之任大都若此足爲同袍之光至汲
引不佞形之薦䟽語過其實不知他日樹立能
無負門下否也不佞才品無一足齒獨硜硜守
已或能同門下萬一耳關河修阻解携遼濶河
時握手一吐此衷也趙州張守行便附候張乃
舍親門下以遇不佞者遇之則厚幸矣

報歐茂野憲使書

不佞行半月始出故鄉之境蜀道之難半在於
楚靈蛇抱退山鬼含愁不意邯鄲夢中有此惡
道往年氣盛尚可堪此今倍增苦耳安得炊黃
梁者呼而解之小价還附謝侯至芙蓉城下專
啓也

報戴鳳岐叅政書

梁山道中聞輶軒將至殊快一見而不佞憑限
甚近叱馭而北令十年仰止之思無緣自遂也
明公才品士林推重清風樓閣暮雨岡巒明公

三西園天牘 卷之七
所貽于東川諸路者遠矣三巴山水安知非明
公顏色乎洪都寵命朝野瞻佇幸明公早命西
轅以荅群望

報王斗虓憲使書

不佞往在漢上讀明公雄文若攬終南太華之
秀近過川北知明公善政又增青居雪山之重
是不佞之仰止于明公久而深矣前承遠使厚
貺感藏赤臆謹專一力代將鄙忱奉大教有日
耶臨楮不勝馳佇

報萬心源叅伯書

往年黃鵠磯頭奉明公翰教感藏已久而川北
一路借明公經畧瞻仰尤切語曰不習爲吏視
已成事明公石畫賤子師承多矣遠承華翰腆
貺在蓬溪道中造次鳴謝諸容專人馳布統希
台慈垂宥不宣

報艾熙亭光祿書

往先公讀門下大䟽時不佞在淮謂國家養士
多羅一峯其人而門下又同榜莫逆殊爲欣慰

曾以此言告之武陵龍伯貞而伯貞誦懷門下
 詩是不佞于門下未嘗一日忘也方爾入蜀聞
 門下京卿之轉 聖主旌直門下于三楚有光
 焉寧獨同榜重也便中勒狀布悃惟門下為吾
 道珍重

報周近松憲副書

七蜀在二司者舊半三楚門下與不佞今財兩
 人耳南北相去分路而治胡馬北風越烏南枝
 曷嘗不舊垆之思故人之懷哉乃門下高才雄
 畧幸鞭策不佞無辱鄉井真私心所倦切耳專
 人馳候起居面教有期未敢多布

報劉肖華主政書

巫山道中得明公召還之報喜動顏色蘇糞壤
 以充帟謂申椒其不芳三閭已有餘慨乃今糞
 壤申椒始有定品此寰中善類之慶非以三楚
 論也瑞塘兄有書奉候便布區區計使旌將南
 指矣諸容嗣啓不宣

報傅弦齋表弟書

江鄉數載極承教愛令郎又得結好吾祖姑及
尊翁存日抱茲雅意今遂之矣不佞入蜀奔走
頗苦平日直性狹中如稽生之不堪多矣家居
已久重增其懶所謂榮進之志日頽任實之心
轉篤長林豐草之思愈快矣賢弟幸掃湖庄遲
之歌者新聲想更妙絕賢弟樂事種種便中馳
詢起居不備

報楊燕山方伯書

門下握符松潘伍年矣碩畫勝筭比古名將常

講毳幕回面內嚮此其竒勲當書麟閣不次之
擢未足旌殊勲也河洛暫借卽三巴父老能無
授鉞之恩乎幸門下以弁州視西南可耳適至
順慶聞使旌將發專官奉送惟門下加餐以膺
聖眷

報古見吾太守書

往玄暉愛山子猷愛竹仲長統愛良田廣宅吾
兄種種備之矣中原多故幸早出以濟時艱毋
耽此樂也軒名有獲力田者秋稽古者榮聊未

通家話柄耳公子竒甚恨不一見臨楮不勝感
戀

報江印石大尹書

尊酒話心稍解向來羅浮之夢足下爲時循吏
尊公不朽矣幸加餐以慰九原大竹志非足下
不可作與縣令言之書成不佞當草一序夜宿
牛頭山次匆匆布悃諸容嗣啓不宣

報孫長山方伯書

不佞已入川北矣昨見關中有陪點臬司之報
竟不可得豈終南太華之靈忌不佞侍左右太
驩耶門下雄才節鎮中原卽終南太華不能久
使旌也偶差人往茶院附謝京邸之教幸門下
垂情千萬

報梅鶴洲廉憲書

不佞前過梁山會古見吾兄論蜀中同榜殊有
眷然之懷惟吾丈與寧宇兄樹勲赫赫爲青城
赤甲重也不佞強勉一出情興索然幸三巴山
水有故人顏色稍足慰耳奉門下大教當在何

日也便中附候起居惟門下垂情

報孟靜菴憲副書

夜至漢州得門下手書知旌旗在省不勝雀躍
雕題鏤身者聞風遠徙自是西南無羽檄矣對
使謝來貺兼請趙俊谷集幸命治書蒼頭檢付
以慰長飢

報陳六亭憲使書

華翰飛自錦屏及于錦官使者勞甚矣莊誦卧
雲樓序有謂門下詩真神品多似不佞者令人

忤愧霞叟言過矣至云伯玉居清于韶居雄伯
玉善用小于韶善用大元美真知言哉讀之一
快助甫客京中與不佞驩甚亦知其第九二善
文翰不佞前乞門下二草堂詩可共賦一冊見
惠如何家綾拜賜不敢以例辭也俟至果州專
候起居不悉

報鄧玉洲憲使書

費憲使還沔得門下手教驩次于面時先公藏
山久矣而西望麓臺石室在萬里間不覺泫然

豈惟感門下書貺之辱即先公知己之恩含地
下矣何以報明德哉今春補官在果州謂從浣
花溪上可謁公家精舍而尊公仙逝矣不覺泫
然豈惟感通家之情重念兩大人隔世門下竒
功鏤山銘鉉乃疲弱如不佞蹇步矣會公子干
錦官城上將往嘉州謁直指公班荆何日臨楮
復泫然不知所云

報陳玉壘學士書

不佞別明公後留錦城者十日今往謁直指使

者于叙南忽有傳明公使輶北上者因念不佞
辱明公收之莫逆十餘年矣幸叨侍左右謂訪
公家讀書巖及登萬卷樓以爲竒邁而岐路相
羈至于如此真俗子之無緣也明公振藻擅名
溢于縹囊而勤勤獎與以天下之才爲才入司
鼎鉉當在旦夕尊公相業顯而大之此寰中善
類之幸而尤不佞所引望者也謹遣一力送之
神宣境上行矣伍雲勉旃自愛

報曹近陽學使書

周家禮殿漢室講堂西蜀教化聞宇內舊矣愧
不佞向來無以嗣之明公負振古之才抱絕倫
之學不佞已與諸生欣欣道之不知過川北一
路在何時也幸高明示之

報朱明虹憲長書

不佞心折明公久矣而三巴往還驩若兄弟先
大夫談海內通家交無如明公者近借使旌秉
憲全蜀謂可且暮遇之一話離索而不佞尚羈
青居山次也不佞往一檄附寇山人者曾投記

室乎專人馳布區區

報周近松憲副書

不肖以念六日至川北次日具書候門下詢之
直指使者方南而文旌在凌雲中巘間可面致
款私而翰教先之矣今以前書奉記室聊此情
耳遠憶先大夫面清光于寒舍向不佞道之近
會左使公時時及門下謂九江相與甚驩弟之
惓惓于門下非一日也遠使腆覬感高誼無量
即日放舟東下面教有期臨楮不勝馳佇

報李信亭僉憲書

明公才望表著宇內久矣不佞承乏閩山而明公旌節正借臨邛自幸得侍左右一快生平而岐路無緣悵結何似錦官城中會諸君子無不嘖嘖明公高誼者三巘之神秀三峨之峯堯斯亦明公之光霽矣夜泊彭山敬候起居舟次無備惟明公垂宥

報史念橋憲副書

徐淮舟中奉明公教言鄙吝之私盡消矣頃者

履任徘徊長庚亭中而明公使旌在武寧城上願一見顏色不異瓊樹枝古人歌詠真曲當人情耳外沔太守公有尺牘上記曹統希台慈垂照不宣

報中軍周子尺書

足下在將軍麾下將軍有事而足下矚然可謂特立從此舉旗光韓山多矣過淮辱尊公愛今無恙否遣使問足下八寶湖握別音書濶絕豈不我思苦蜀道青天耳努力自愛

三西園集 卷之七
報彭山朱解元書

夜來舟中與足下驩然道故早起讀雄文大快
稍稍以鄙見請益足下今之楊馬也許相公知
足下于十年之前行薦子雲文似相如矣努力
問學以荅知己文奏盈前懷人心賞卒卒不多
談

報陳六亭憲使書

兩得使者書世好溢於楮墨披玩之餘何異醉
卧雲樓上耶門下神王情怡宜其所作度越古

人草堂二詩幸一揮之專使馳候不肖至閬州
有日矣錦屏霜葉還如當年否臨紙無任含情

報劉小泉憲副書

使軺榮發不佞亦西見漢濱父老誦郢上循吏
縉雲清操涇縣惠政明公兩得焉茲口碑也追
崇陰而並峴麓乎不佞侍左右幸甚通家高誼
比于肉骨即百拜難鳴謝私也專人馳布惟明
公垂照

報楊仰洵少叅書

湖海同袍得聚一堂其合非偶乃明公才望傾慕彌切不待握手論心而夔門劔閣之間若比翼而聯裾矣使旌榮任專吏奉迎于錦官城上兼致賀私統希台慈垂宥不宣

報劉鳳坪中丞書

不佞再至萬里橋西而門下良訊至自萬里已為竒構發函伸紙慰喻綢繆珍品雞墖惠及遠吏昔人金錯刀之贈青玉案之投何以加焉謹百拜申謝門下勲樹超倫萬流仰鏡願加食以

膺天眷

報朱秉器憲長書

別明公伍六年而錦官會晤如在夢中已慰長飢故人交好完如金石情深今日名重異時如扇頭所云願共啣之惠來新詩十三首弁汾上佳談呼燈披衣讀之一過如探玉環惟恐其盡也關中孟與時憲使與之論文博雅可畏明公當投合矣登車匆匆謹此代面以謝高誼西亭之宴有期矣

報戴鳳坡大叅書

潼川道中授使者書既乃文旌東下矣讀明公
手教若耳提而面命焉風胡斲冶之劍合弁有
時安知不作斗間紫氣耶使還附謝匆匆不具
報李元甫學士書

徃于本寧處得足下一書弁太和游草中言吾
兄弟三人俱制歸也楚楚不能讀比至劍關而
使旌北矣 主上更化端人柄用憶昔燈前促
膝之談今付之長嘆矣大拜有期勉旃自愛元

忠學士行第奪于公期造次布悃別具申遠吏
寸私耳幸足下笑存之良晤何期臨楮增悵

報林石洲學憲書

不佞欽慕明公有年矣徃先公叨明公榜末是
科多文翰之士明公與梁公實並起南海乃公
實早世未見其止而明公才華燁然藝林曾三
甫少保每誦明公交好在古人之間而羅國華
中丞出明公手教新詩共擊節誦焉開元詩篇
永和書法有頽還舊觀者曾託丘謙之一道三

三曹閣天牘 卷之七
十仰止之私而謙之亦未報也近補官果州會
太守周國雍詢明公道履萬福良慰鄙懷 聖
明在上更化善治負蓋代之才如明公者柰何
不為蒼生起乎勉旃自愛以需特召不佞有草
堂數處乞明公一詩更望大書可作扁者諒辱
通家不吝珠玉且託太守公先容矣海天遼曠
無任神馳

報袁浣沙少叅書

不佞每謂峨山之竒絕凌雲之弘敞三巘之幽
遠即海上三山不過也明公今為主矣品題花
鳥得無深愁耶黃河舟中草草一別明公作人
教化風動百粵不佞喜川以南士得所依歸不
知握手論心當在何時也謹勒狀申候起居惟
明公垂宥

報鄧玉洲憲使書

明公才華蓋代而開誠布公使人僉忘其身遠
者青城近者銅梁蜀有三司馬矣幸為社稷遵
禮哭老伯奠文言有盡而意無窮即老伯知不

肖于九京况明公乎兩鳳毛當並鳴趨庭多新
得也裁書東望惟有神馳

報周晴川少府書

尊公詩思酒態前無古人數十年所得無論人
寰難比即安期羨門何讓焉未竟之業在門下
大而揚之幸節哀自慰不佞奔走閩州間遣一
吏代躬吊惟門下垂宥

報龔懷川御史書

往明公使輶過錦官也幸接台教惓惓於太翁
郢上弁州又道先公往還之悰不佞至今心藏
之十餘年矣明公白簡風清赤囊天遠海內稱
名御史有如明公者乎中原多故幸明公早出
以濟時艱謹遣一吏致起居之敬惟明公垂宥

報戢金溪少叅書

聖明更化吾丈又純孝之臣廟堂當簡而用之
海內士林驚蜀有兩令伯矣謹此勸駕北上勿
云康樂石門仲長廣宅駸駸落手而遲遲其行
也醉我尊酒分携太迫平原十日之約不知何

地續也幸丈一咲

報中軍周子尺書

承使貺遠辱何足下之垂情若此也尊公詩草格雄而氣高當與近日誠意臨淮並傳向語尊公云公以古人墨妙見惠即草一序尊公咲而應之足下圖焉陳憲使誦服足下新詩其孫陳化在足下麾下幸一垂青之

報邵養菴吏部書

明公亮節高致表著宇內而不佞重游西省絕台光而領玄論識韓御李有殊遇焉明公柄衡在即洗頽風而振大節寰中善類翹足而待謹勒狀申候起居青城山吏心遙遙北矣

報張崕峽尚書書

樞密重地端肅肅敏不佞尚病其少文而門下以宗工掌之且與嘉定烏程鼎足而立即廟堂多才有如三老郁郁彬彬者乎便中敬候台履萬福北虜稱臣久自是膽益寒矣

報高鳳渚總督書

督撫經畧二奏草不佞幸卒業焉明公之學識
無論矣而意圓語達若農于粟而士女于布也
精神流行足以感上心而屈群策樵夫耻危冠
之飾輿臺咲短後之服自古道之矣三關山孰
高可鏤俾明公疆場之勲天壤乎太夫人善飯
聞尚經其家此期願之兆明公純孝大福乃爾
第六司馬之召恐當作毛生檄耳明公倘以故
人語視之或可博一喙也山城空署懷明公孔
殷謹此代候起居萬福惟明公加食以膺天眷

報朱明虹憲長書

使者遠至山城讀門下翰札高誼滿襟令人不
敢當况重以腆貺乎拜嘉增悚愧耳連日手河
汾二草格高而逸調渾而竒洋洋乎周秦之風
矣昔子美踪跡半在秦蜀而詩工門下多驚人
語信山川之助也至佳談一冊采綴異聞依輔
名教識罇于之樂辨中山之銘古人之博又何
讓焉獨褫亭之虎崆峒之鶴東山之狐似語怪
耳黃華老人刻浦城雲麾碑記室能分惠否乎

巫山博士帖尚未來前談旦夕望一讀不佞恐
十二峯神女愛明公佳話遣風雲而留護之博
明公噴飯報謝不恭惶恐惶恐

報曹自山參政書

不面門下清光五六年矣時時于夢中邁之近
會憲長朱公道門下體日康而神日王豈乘雲
步虛出入千里呼吸無間者耶陶弘景山居恐
不如是之適也謹專人代候起居外一檄寄中
丞公者便中幸致之大江之西

報陳崑崙禮部書

吾兄于老伯母平時極其毳之養近日多捧檄
之喜三釜而樂即異日三千鍾亦樂也藏玉佳
期想在今冬業命圭兒代奠几下矣吾兄節哀
從禮弟往年過痛先大夫今此身多病吾親去
而吾有吾身當思愛及其親也吾兄垂聽焉求
川尹新政赫赫逢人說項自我輩事初至倥偬
意不宣展惟兄亮之

報費國聘僉憲書

別來褰帷讀足下詩如流風回雪落花依草令人應接不遑又川西父老走問足下起居甚悉不佞私叩之咸謂廉平之政與浣花溪水並流屈平有言世溷濁而不分好蔽美而嫉妬彼點璧者亦忍矣春風將至幸早命北轅以慰士林之望尊翁納福勝常古人坐隱卧游兼之矣少白昂生幸爲我致意輞川得一斐迪以爲勝游今青桂亭多二仲也匆匆不多具

報劉朴先大尹書

自足下紐金章縮墨綬而浙也英風妙譽馳於海內足重鄉國矣近聞會稽父老無不嘖嘖善政而稍稍間言乃一二有權力者此宓子賤所稱揚鱗魚也何足異焉陳宮詹惓惓于足下若非尊制不內召卽內補矣幸足下加飡爲蒼生珍重鄙敬命圭兒致左右矣

報史繼峯太守書

數載家居承明公顧盼翦拂業銘心骨矣顧郡乘一書須得詞潤金石義薄雲天者乃可爲之

而明公以載筆之役委之不佞不佞行能無筭
文采日滯勉強應命途間已屬草于盛生想登
梓矣獨愧魚目爲珠燕石爲寶重爲明公知人
之累耳風便幸教之

報曹荔溪中丞書

不佞已至果州矣前專遣一力候尊公起居萬
福聞其行不以杖尚作蠅頭小字此期願之兆
也明公一意報國勿煩西顧此中大老多遐齡
者如憲使王公虹岩年八十五翰林任公忠齋

年八十三宗伯王公南岷年八十方伯王公嘉
江年七十五相國陳公松谷年七十三不肖每
諷諸老修耆英會諸老咲而不答乃知洛下香
山高絕千古即先公復中高年會亦爲竒邁今
渝州獨尊公孤秀耳豈山川之氣獨有所鍾耶
所乞西省諸書明公便中致之沔上恃明公知
愛乃爾柰何不報耶

報劉鳳坪中丞書

下吏竊祿明公梓里方愧無毫毛之敬而明公

三才圖會 卷之七
瑶華先焉何以銘佳貺言樹絲與桐鄙懷似之
矣滇國晏如中外禔福明公輕裘緩帶之餘亦
有雄篇勒點蒼昆明間以爲西南重乎千載一
時幸明公少留意焉不腆將忱無以報瓊惟明
公垂宥

報趙寧宇中丞書

震且山靈之秀無如武夷而明公雄才碩畫足
以當之自是八閩無鳴鏑矣不佞與明公學政
一堂明夕縮帶子期伯牙之遇孰謂前有古人
耶而數年以來音書濶絕又不聞問言之於邑
不佞委瑣齷齪何敢望明公萬一獨念明公之
深腸一日而九迴也偶遣人候尊公附一楫于
左右明公倘錫咳唾之音乎燭也傾耳以俟

報錢秀峯侍御書

明公造羽鴛鷺名重柱下久矣而三楚掄才乃
得借明公之重小兒汝璧叨出明公門下每言
明公肅繩司過爲名御史而國士之報當兢兢
然圖之今選紹興司理吳越相近望明公督教

三酉園天牘 卷之七
之不佞補官川中得明公翰貺驩驩次于面陳生
堯仁爲名家子從此推轂端不負明公託矣裁
書南望無任神馳

報許東水太僕書

門下開瓊筵以坐花飛羽觴而醉月林居之快
極矣而公子且四徐卿二雛王家三鳳無以過
之書來有尊夫人之戚情之所鍾幸勿過痛爲
造化小兒所苦也小阮學問長進殊爲戀戀昨
已走人候伯仲佳幣附使者完上高誼心領矣

報李本寧大叅書

不佞西游牌發京山思訪精舍一話離索而景
陵水大竟不能往我心忉怛懷如之何陳元忠
學士一面而別有書投記室爲小吏誤拆大都
同心之言可相聞者也荊州相公一敗塗地平
日稱門下士者洗黨而樹聲有不得不然者崔
公勒門朱穆絕交古今人情又大相遠矣春日
風和輕車道熟足下早赴北闕大快士林元忠
言足下工文之外事事求精恐勞神氣鄙意亦

然足下垂聽焉

報張肖山憲使書

四明東揚山水清越無論中原卽震澤以南稍
遜焉明公高牙華旄饒歌鼓吹此其游不愉快
而稱壯哉憶昔牛山與明公結尊酒良夜之驩
新亭復成不佞再過而明公遠在萬里江城照
日山谷含風千載如新杜陵有言故人從此去
寥落寸心遠相思之懷今古同揆明公徙倚鄉
園得無意于不佞耶璧山司理紹興在明公部

下幸以通家猶子一鞭策之昨專人候宅上俱
安明公勿西顧也

報蕭拙齋太守書

往聞明公倡正學于陵陽呂山之上仰止彌切
而同鄉耿叔臺誦明公雅有道氣令人欣欣然
抱執鞭之願矣頃者朱幡借重會稽一時清譽
風動四明昔山谷父老所稱明府下車以來犬
不夜吠人不識吏明公又何讓焉不佞謂古人
渡虎下鳳馴魚買牛循良之業千載不朽何莫

非問學中來耶敢爲明公誦之小兒汝壁叨侍
明公一堂幸有道者以善養之或能稍稍樹立
耳偶乘家僮之便謹此奉候統希高明垂宥

寄壁兒書

紹興山水清越而汝衙又在山間爽塏岡巒蒼
翠時落几案間一行作吏便可自適殊爲汝慶
仲尼曰古之聽訟者惡其意不惡其人求所以
生之不得其生乃刑之歐陽永叔曰求其生而
不得則死者與我俱無憾也汝允念之蕭太守

公聞有道氣汝可善事之張憲使吾故人二公
俱有一書覽而轉致之秘方真引一冊中有耐
煩說乃筮仕者所當知汝宜置之座右

報曹近陽學憲書

明公方布功令廣勵學官日不暇及乃遣使投
翰遠詢賤子益之清惠乎珍感無任明公今之
伯樂也梓州閬果之間有駿滑絕足載奔載赴
幸明公早鞭策之以慰長鳴

報羽明王秀才書

足下苦學工文必有知而獻之明堂者幸與圭
兒勿虛三冬石林山庄松杉無恙否足下倘往
蓬山爲我一省之崇鳴靈福二碑語李君早刻
之

報張玉岡大叅書

往使旌在淮不佞備員部下乃辱明公倦切之
愛百倍尋常憶初釋褐時與明公在內廷相見
不佞即以名御史期之此意在明公尚省記否
荆南爲吾楚上游乃借明公之重岳陽仲宣兩

樓相峙邈焉霄漢而洞庭君山之勝屹然烟水
之間明公風猷令問同其高深矣偶兼任博士
之便敬候起居任子有學行忠齋太史之子也
幸明公垂青焉若不佞之感高誼終身莫報即
百楮未盡也惟明公垂宥千萬

報張助甫中丞書

明公以文章起河洛雄博芳潤溢於縹囊公家
定書三篋作賦三都者無以過之海內有握靈
蛇之珠抱荆山之玉者孰不願就正於明公乎

而明公韻宇弘深不却衆庶卽不佞駑鈍明公
收之知交之末論心則干鬲見底談藝則咳唾
成音豈昔人所稱川澤納汚山藪藏疾者耶別
後寧夏借重明公開府自是九夷喁喁內嚮矣
忽枉柔翰慰其寂蔑而惓惓獎與令人殊不敢
當令弟見甫高才博學不佞仰之十年矣方幸
共事以一面爲快而于役長安倘綿力可効當
盡通家兄弟之誼何煩明公喋喋耶閩州陳于
韶先公同年厚友不佞莫逆明公語及足徵憐
才至意然推轂若穴于明公有厚望焉報謝匆
匆語不宣心

報梁綿州書

令兄公實與先君子在同榜中結同聲驪所云
芳草淒淒春已過送春更有新詩否真秀句也
先君子時時誦焉卽中承足下賦雪坡草堂詩
至今光焰在竹樹間綿左借重三巴花鳥何幸
得足下品題也楨伯書已領江魚當達金陵也

報張見甫文學書

春間都門與中丞公談藝話心致足樂耶乃中丞公時及足下古之謝庭岑家今之二王兩汪也入蜀即走東詢陳于韶于閩水約足下作草堂詩于韶報書云足下驅車北矣令人悵結不佞乞中丞公雄作業在竿牘中足下爲我懇而寄之相見有期不多談

報魏文可少府書

前會周憲使劉比部津津足下同袍之誼爾爾乃翰貺遠及果州足下誼高矣雲山稿詩宛而麗文簡而古必傳之作也足下新詩何借青玉案之投乎足下才華如濯錦而江陽之政影節邁俗當有非次之寵矣勉旃自愛小草一冊牙圖書三面奉記室引意道路阻且長會面安可知古人語不虛矣

報蒲州張相公書

文燭委瑣自乙丑出老師門下二十年矣往歲備員廷中今春補官京國辱老師惓惓接引猥見照臨真咳唾爲恩矐昧成飾矣犬馬力微鞭

策頗難伯樂之顧韓國之知有中心藏之而已
老師調和台曜羽翼王室甫及暮年而相業炳
然若景星慶雲人皆仰之大都去左右之儉佞
召江湖之忠直言路大進國運一新昔仲尼相
魯三月而誦袞衣章甫惠我無私矣子產相鄭
一年而治市不預價道不拾遺矣說者尚謂聖
賢得民之難乃觀老師感化又何易也大都老
師以天下之公心處天下之公事韓魏公有言
大事皆賴天扶李文靖獨無密啓正謂公也不
肖竊窺華亭深于佛老新鄭似乎管商江陵雜
以申韓宜其功業不逮古人今日寰中所望于
老師者真非淺淺太翁襄事既畢遵禮節哀以
俟 聖明之簡注不肖別後歸滯湘南者半年
今履川北任亦數月矣關河修阻職守攸羈謹
遣一力代致几筵之敬恃老師知愛不覺喋喋
惟老師憐而教之

報楊本菴侍郎書

太老夫人佐太師公爲太宰勲樹重三朝又見

門下登樞府紹玄成世業 聖明恩寵史冊亦
希卽列僊傳中所稱上元夫人西王母之倫不
是過也願門下加飡爲社稷珍重不佞叨守川
北見尊大父公徃憲閬州每遇名勝輒多題品
益嘆公家世美從來遠矣謹專一力代候起居
中條山遠無任神馳

報張翼海侍御書

徃門下在南中絳騶清路白簡深郊桓典江淹
其人也而徃徃留意故人先君子之訃也門下

走使而貺焉感藏赤臆不能忘也每讀門下題
詠上追徃哲彰明射洪眉州新都高絕千古亦
蜀之山川秀甲中原所鍾宜爾也今不屬之門
下而誰屬哉大作有梓并南臺所刻諸書願有
請焉不佞入蜀謁兩臺無虛日望門下精廬財
步武耳先遣使代躬謁少暇當驅車於巴嶽武
勝之間一話年來離索也門下許我否

報田春野給事書

聖明在上從諫如流而門下借重黃扉有補闕

拾遺之任曩讀門下一二封事皆純意於國家者昔人言韓魏公擇利范希文近名乃門下無所擇而無所近也九重西顧幸門下早赴闕廷以慰簡注春首都亭辱門下尊酒禮遇高誼翩翾若浮玉壘而上之矣專人代候統希台慈垂照

報王鵬江憲長書

尺素自羅浮此非雲墜哉讀之揮涕至河止手碑傳漂母枕中鴻寶遡安期之句擊節賞焉煇

石尋玄島神井問丹砂如明公佳詠何日披襟耶雙劍雌雄或離或合見明公有日矣大邑令真小馮君也心藏而口揚之

報傅廣居大尹書

春初都下奉明公清光時與屠長卿雙璧競爽歲序如流素秋忽易每念明公英詞金石高義雲天而清言玄理恨牛馬走中無能領其緒餘武城之歌單父之琴時時于夢中遘之乃知太湖巫峽千里而一堂者非謂同心爾耶便中布

候起居弁以拙作呈上斤正明公惠而好我幸
遺以瑤華

報馮咸甫進士書

往致足下書于尊丈人喜甚每談足下交相驩
甚也足下藻思綺合披華振秀即三吳多才如
足下者非表表耶別來游金陵登雨花燕磯諸
勝見壁間雄作欣然有懷足下恨無能出一語
山靈有知當移文讓焉豈足下珠玉在前覺形
穢而止耶尊丈人公子三曾讀其時義合作瓊

藥懸黎世有珍之者莫廷韓歸耶惠我卧遊圖
佳甚山色晝光水聲夜聞古人所稱通神手正
不虛矣足下作一卧遊歌稱雙美矣如何如何
偶聞尊丈人使回呼燈草草弁以拙作奉記室
一笑

報內江史大尹書

不佞入蜀聞足下英聲赫赫嗣于途次相晤見
足下標格冰壺迥出物表令人欽慕每逢人口
足下不休亦好德爾爾內江之難于治而尤難

于志聞宇內久矣足下兩得之高吏部作雄博
可愛蜀中新都志稱絕又雜以庸人之手恨不
起用修而正之使來梓州呼燈草草附謝

報張徵吾僉憲書

不佞往附令兄仰歷年末號稱同志業聞明公
高才足稱雙璧適有天幸得借使旌于荆西石
城陪尾之間無不歡欣以迓而况沔為駐節不
肖又叨世講者乎謹命小兒代賀故園在望無
任神馳

與羅元之進士書

劉子伯仲來承足下遠翰寄我新詩讀之一快
子雲侯芭之遇孰謂千載無古人耶不佞居黃
蓬三年得詩數首一二知己強災于木奉足下
一咲近闕仕學軒于署中稍稍弄柔翰恨俗吏
有塵氣耳匆匆報書足下才美努力自愛以應
承明之選

報陳仁甫宗伯書

潞河道中夜與足下別謂可方舟南下過呂梁

歷下邳泛揚子登金焦探雨花燕磯楚漢六朝
之跡可俯而吊也乃遲足下不至布帆無恙竟
底漢上而公期且迫携家入蜀矣終夜南望懷
足下不寐憶與足下同榜幾二十年矣而足下
讀書翰林每謂夜卧館中夢寃俱清間與足下
飲酒賦詩絕無塵俗夫冰條金炬世所稱清華
者也而足下情致深遠時在洞庭衡岳之間奚
必待巨然畫山董羽畫水始足爲玉堂重哉足
下品流之高弟所深服而浮言無當乃使足下

有留滯湘潭之恨屈平有言黃鵠寄處鷓鴣所
制也神龍陸居螻蟻所裁也黃鵠神龍猶如此
而况賢者之逢世乎計足下處之裕如不以在
外爲欣戚也况宇內之公論漸明而聖心之眷
顧愈隆東山之卧安能久乎願足下加餐俟之
順慶太守周國雍足下所取士也每會懷足下
頗殷謀遣一力起居足下聊見萬里故人之思
耳足下勿金玉爾音而有遐心

報劉望雲叅將書

不佞與明公遊蜀者再矣往者錦官一堂今雪
山千嶺矣懷人之思夢寐遘焉明公勲樹赫赫
西南不佞故倦遊也安得縮地之術與明公醉
射洪春賦出塞歌一洗五六年離索之苦耶王
中丞書前已領訖使還謝書貺之辱餘惟明公
加餐以膺推轂

報陳洞衡大尹書

龍伯貞云足下築吟臺以自適懷曠達矣而又
得宗伯公暫歸與之倡和古所稱兩院諸謝能
稿二冊以當一面足下倘與宗伯公登臺西望
有清風明月十二峯頭來者非不佞顏色耶

報宋桐崗王中宇叅政書

不佞叨附門下榜末二十年矣往有先公之變
歸卧漢上者三四年今補川中奔走于鳥道猿
林之間每念游好如門下無論面晤爲快思致
音塵慰寂蔑也何可得哉佇立想萬里攬衣有
餘帶昔人謂我矣門下風猷令問大河嵩少相

三曹國子府
卷之七
四三
爲不朽計 聖朝簡命當在旦夕不腆三楚可
能暫借門下旌旄乎此又不佞惓惓引望者也
偶乘舍親之官之便敬候起居時在會城報書
無倫惟高明垂照

報趙見亭學憲書

去冬北上漳河署中辱明公之愛引滿浮白披
裘見素特達而相知斯千載一遇乎憶與令弟
中丞公結同榜歡業知雙壁競爽乃于明公傾
蓋如故不啻中丞自顧薄伎何幸奏進于伯仲

有道之側耶分袂以來仰止彌切嗣後明公召
還職方秉鐸河洛矣夫高唐善謳唯渙善畫齊
魯于文學乃其天性而又鼓舞于中原佇看夷
門澗瀝之間效王豹而學藻績者不知其幾也
梁園之賦鄴下之才得明公還之古與不佞補
官入蜀奔走經年感王陽之畏道抱相如之倦
遊行將爲洞庭漁人矣愛我如明公何以策焉
偶乘龍司理之便奉詢起居天風正順願惠教

言

三酉園天牋 卷之七
報李信亭僉憲書

錦官城上聞台履將至方有晤言之適而公期且迫竟未如願情悵如何明公才凌劔閣望重雪山而滇雲有事廟堂倚賴明公雄畧豈區區西南所能專哉而聖君賢相借才之重乃知龍泉大阿風胡之所利也驚帆凝露天廡之所急也佇見勲華勒點蒼而銘昆池矣私計旌旄將指天南敢遣一力代起居之敬致其願祝者如此春風萬里加飡自玉

報何克齋封君書

不佞通籍以來欽門下山斗重望久矣兩度巴江苦于奔走無緣候長者杖履鄙心殊增勞結也門下博蹇好修遠想高步靜養山中時來聖眷海內有操人倫之鑒而立士林之準者安能舍門下哉謹遣一力勒狀申候聊見生平仰止之私惟門下垂宥

報陰月溪司馬書

梓州道中幸得浥門下光範今幾十年矣門下

才通能備義緯仁經屢司文鐸則六藝之芳潤
衣被士林近握兵樞則九邊之運籌光垂竹帛
宇內之清望益著 聖明之寵眷愈隆昔人所
稱驥首天路鴻毛順風無以過也不佞履任果
州敬勒一楫奉候起居江湖遠吏語不宣心

報何來山侍郎書

不佞十年後先入蜀辱門下惓切之愛感淪于
骨頃者專人奉候尊公山居甚適道履萬福叔
寶理遣之談彥輔名教之樂真足爲士林重也

門下台衡鼎望 聖明眷佇幸勿殷西顧之懷

報左鑑麓少叅書

同榜中才調稱同聲者絕少以意氣稱同心
者尤少幸于門下兩邁焉夜過漢州方苦行役
令親張子投我瑤華呼燈讀之如見顏色大稿
卒業如命撰數語門下取其聲之同心之同耳
其言不足重也什邡似舅能于其官第當不虛
尊託也門下猷畧久著邊圉世道清明弓旌滿
野幸門下爲蒼生一出勿徒耽佳句也

三西園天牘 卷之七
報高念吾太守書

曹學使來得明公瑤華益之腆貺。縹袍高誼上薄雲天矣。新都難治甲于東南。學使公道門下宜民之政深。婺水而卑。黃山不佞所素服而深信者也。不佞履任川中。忽焉半載。走奔關河。止存皮骨。愛我如明公。何以策焉。學使公人便敬謝起居。夜夢迢迢在紫陽城下矣。

報休寧丁大尹書

往詹大尹來得足下手書。弁草堂詩白雪之調。

真難爲和。嗣聞足下綰綬新安。足下雄才博學。當在金馬石渠之上。然孔門文學莫如子游。而絃歌之化赫赫武城。詩三百篇盛于豳風。而周公七月之章。詳于民事。古人所謂詩與學可知矣。足下琴堂多暇。褰帷可賦。汪司馬公有豐干社而龍司理近開黃山社。足下茲行又何快也。况借重三四年。即召還內廷。智士不擇官良。金不躍冶。佇聽足下英聲滿東南矣。勉旃自愛。

報陳六亭憲使書

六羨歌竒甚桑苧生痛哭于野無知己也千載
而下何意得門下與不佞哉春風將至錦屏必
登門下洗爵以待

報徐子裁山人書

足下遠游又得以侍侍御公其人與才足依也
西征倡和讀之一快峨眉十首其絕頂之雪月
乎山東李伯承久不聞問來書歲月遠矣悵如
之何寄我詩扇何物便了乃爾竊去豈侍徐陵
久雅好文耶恨不使王子淵以僮約責之答一
百令早歸黃土陌耳博足下一咲他日見伯承
與足下一佳話柄也不盡不盡

報戴梧臺太守書

長安一別南望楚雄不天上耶比至劔門則吾
兄政聲稍稍習聞矣夜犬不聞晨羊絕飲譽舉
六條功最萬里如往牒所稱又何讓焉三夕秉
燭驩悰無厭梓洲丈得續之兄有三巴之夢及
于不佞乎便中附布謹獻舊草一博新詩

報丁梓洲太守書

西園天牘 卷之七
張趙洲行魯附一書想達記曹矣計門下久于
大理殊擢旦夕第徘徊果州暇時憶吾楚同袍
兄弟向來彬彬二十年間歸卧山中者半化爲
異物者半近陳宗伯以論歸董侍御以憂歸而
徐歐二丈同游百粵乃兄與不佞尚共西南耳
盈盈在望乃爾參辰則山陽隣笛之悲西河索
居之感當何如也長安宴會夜以繼日威儀虧
替言語漏滯恨此景不常有耳兄可移書梧臺
丈一道區區也任司理行便造次布悃滇雲萬

里強飯爲佳

報張翼海侍御書

前得門下手書并讀西征倡和之章季鷹清才
江東獨步而佐以南州高士語語驚人又何怪
也楚中二樓自崔王之後乃得題品如門下郎
官湖去沔頗近恨江外草堂不荷門下品題耳
敢具別楮乞門下珠玉約子裁同賦新歲專人
乞記室也使翰遠臨益之賕貺再拜而受之統
祈尊亮

三酉園尺牘 卷之七
報陳玉壘學士書

別來得明公廣元書讀之神馳暇時登果州書院連峯千仞背流百里有詭然而蛟龍翔蔚然而虎鳳躍者再登江樓則水木清華又讀明公集句百首鏗然而韶鈞鳴矣不佞徘徊如見明公顏色因語山靈謂明公啓沃聖心霖雨蒼赤孔德彰爲北山之移淺乎覩矣尊公先生不佞時時候之尊酒終日了無倦意其精神百倍與明公握別時大爽幸明公一意于廣廈細氈之

上勿膺西顧也不佞周旋川北又爾改歲公署多暇尚得取古書讀之恨明公在北不及請正耳謹勒尺素以當一面弁求雄作于記室大拜在卽加餐自愛

報朱秉器憲長書

往與門下談劉玄倩集昨取而讀之真傑作也揚用修見其過漢武陵詩甚愛之自以爲不及恨餘作未稱且早卒未見其止耳玄倩新淦人門下有鄉土之情又憐才感舊能檄崇慶州一

新其集乎今以一冊奉記室清覽別具幸門下
爲我賦之

報鍾闌石太守書

往遊峨山得明公爲主今再過嘉州而情興索
然得非以明公擁朱輪在萬里外顧馳情爾耶
明公才美意氣迥絕塵俗不見吾叔度五六年
矣鄙吝之私何日消之偶懷野任司理行草草
當一面司理公溫粹如玉與明公有良晤也

報田小泉評事書

廷中別明公長遠矣褰帷西來得識子由文雅
何異與長公面耶華翰遠頒如覲台顏西春亭
之咲語時于夢寐邁之耳便中敬謝高誼峨山
草堂記奉上一咲餘惟明公加餐爲蒼生一出
臨楮不勝馳遡

報張翼海侍御書

風日熙和江山晴麗門下乃與子裁和歌即浮
花菖葉鳥語鶯簧得無以門下品題應接不暇
耶謹專吏獻卮酒之敬春夢迢迢在武勝山間

三曹園天牋 卷之七
矣

報蘇夢臯少叅書

不佞前訪明公見山居甚適昔邴曼容言辭滿
不謂祿謝病不待年陶靖節亦言久在樊籠裏
復得返自然其明公之謂乎遠辱華翰情好翩
翩詩學正宗拜明公之賜矣餘貺附從者返上

報周東郊太守書

承惠墅談讀之一快胡承之乃關中才子博學
善屬文茲編似齊諧志怪矣松化石男生子世
寧有之乎可博門下一笑便中謹此謝來教西
望忠州盈盈一水訪宜公居易祠與門下驩然
道舊尚有日乎臨楮勞結不知所云

報朱秉器憲長書

承翰教知西亭梅花盛開矣綠英紫籜生所未
知大都世外佳人也溫香瘦影宛爾撲面明公
有高調一點新粧乎謝少安全集奉覽中有拙
序幸明公斤正之五君詠完上矣

報楊宜菴給事書

不佞別足下五六年矣同鄉有歐憲使者曾致書滇中而未報也比再渡果州會尊公詢足下起居良慰未幾足下被徵召過瀘州有暮雲春樹之感乃得足下道中書知夷警頓仍鞅掌不遑然扇頭之句比于青玉污水之思同于白雲如足下言念我殊甚惠我品物得無溷清吏耶曾與尊公一粲矣近得邸報足下拜省郎又在天垣喜而不寐者連夕豈以黃扉青瑣遂能使足下重耶但丈夫之志宣于言言行而志行焉

歐陽修有言朝廷置臺諫若使默然却是失職范仲淹謂石介好奇責人主以難行之事至引裾折檻叩頭流血人主富于春秋若無失政安用如此二公之言可念也故曰志其大捨其細先其急後其緩專利國家而不爲身謀彼汲汲于名者猶汲汲于利也願足下慎圖之尊公往來殊爲一快聞時時與客手談坐隱載酒問奇者門無虛日又得足下在天上昔人所謂雖有離憂其心樂也足下努力清朝勉事 聖君勿

三百國天牌
卷之七
三
列
以爲念

請孫撫院登錦屏啓

伏以春華悉吐景物咸熙幸覩旌節之光正值
登臨之會恭惟臺下才全王佐德備帝師坤維
之政澤方新當宁之眷懷尤切僭陳薄席敢借
名山錦上竒花爭迓三台之綉屏中嘉樹恭迎
八座之車

請孫撫院出境啓

簡命遠臨四海仰耿光之被台衡遙發三巴竊
慶幸之私君子之道方亨治世之景自別恭惟
臺下龍門人傑鳳閣名儒啓事山濤宇內久瞻
真吏部用兵諸葛人間爭覩武卿侯化洽坤維
道行乾健垂紳在卽晝綉有期燭等受事臺端
追隨祭戟借七盤而設席佇聽曳履之聲延八
座以飛觴少致攀轅之敬

報黃春亭少府書

不佞之知兩郎君也甚竒而其知令壻楊給諫
也亦竒然與阿戎談則南山之木並美矣見右

軍才則東床之智獨運矣明公通家交有如不
佞者乎屢度嘉陵忒賢者之廬而明公方請朱
纓于塞上弘績遠矣茲當離蜀布一椹于記室
與明公班荆有日耶臨紙依依

報江見泉文學書

長安道中與明公晤殊爲一快入蜀朝夕令兄
時詢文輿有江東雲樹之感今南充之政告三
年成矣而鄙人有八閩之轉公家文通所謂默
然銷魂者惟別而已此其相與可知也明公才
美行將大魁天下努力加愛便中附布區區彛
以拙作二種奉記室斤正

報保寧馬教官書

不佞有書致蒲州楊少司馬公云徃先大父巡
閩州俊民讀書三年有師馬教官可念也不佞
高其誼貴不忘賤遠不忘先也具不腆贖左右
足下倘有書致司馬公爲道鄙意亦不忘故人
之託也何日至錦屏山與足下一晤

報周國雍太守書

夜至廣寒館中得左使公書知不佞閩音的矣
別足下不有期耶昨任少海先生致書不佢謂
平生不能作說客言足下慕不佢在十年之前
不知不佢之慕足下尤甚也至謂足下治郡而
舉政教操觚而窺秦漢不知不佢之知足下尤
深也前見諸公謂足下當司文柄諸公首肯之
又幸諸公之慕足下其相知不啻吾兩人也徐
山人來耶足下當爲四詩別我令子裁大書見
惠懸之山堂如對足下清光耳少海啓即留記
室不必見還也

報丘謙之太守書

梅如來得足下與明卿書良慰離索乃梅如又
善歌一日而獲三適矣足下兼吾亭草不佢得
之朱秉器處足下在海南大進古人所云江山
之助不虛矣弟再入蜀奔走頗苦乃屏山西湖
間有足下高誅如見足下也奉懷俚語在刻中
足下有武夷之興乎弟入閩以俟

報彭白嶼檢校書

三西園八牋 卷之七
五
往蜀中得足下書今再入蜀而足下邈焉萬里
矣會史憲使詢起居清泰兼有名園之適古人
如柴桑履道千古不朽以人重也足下新詩翩
翩又何讓陶白耶不知園以何名暇時當賦一
詩掛姓名于烟水薜蘿之間作舊游話柄耳風
便幸惠德音慰我岑寂

報馬仰湖鴻臚書

郭司訓行曾一布悃暮雲春樹我懷如何每憶
足下燕京之游才華情景宛在目前乃歲序且

十五六易矣太真出浴圖尚存笥中否此卷用
筆精絕意態可愛而又得公家兄弟題詠于後
可謂三絕矣敢託史憲使公索之足下能割愛
乎彭與白聞有名園與足下倡和可謂王維裴
迪之游矣登臨諸作便中願有以教之

報順慶諸門生書

夜泊夔門聽竹枝詞重別也乃吾黨離索何異
哉不佞四度嘉陵而無寸補公等勉學早應
聖明側席俾吾道大行乎是所願也臂痛廢書

西園天牘 卷之七
不堪覩縷

報蜀寮長書

分袂以來倏爾出境回首台光宛在天上聽杜
宇而銷魂聞竹枝而攢念勿言一尊酒明日難
重持古人之語豈不由衷乎至勲名重乎雪山
愛雅深于巴曲鄙懷悠悠管生難託矣

報李對泉方伯書

不佞入蜀而明公使旌翩翩五臺矣乃青羊石
犀之間勲樹屹然每坐紫微堂與諸公夜語無

不感戀明公者中條大河宛在几案况不佞舊
游在十年之前乎近見邸報廟堂舉邊才者輒
首明公 聖主推轂在旦夕願明公加餐俟之
造次報書不堪覩縷

報張公子書

不佞侍尊公教最深得讀伯仲聯珠稿山輝川
媚心甚竒之僭爲評品夫火齊木難無經而至
况賢者之文乎必有采而獻之明堂者圭兒拙
草附上一啖魚目混珠益彰盛美

報朱秉器憲長書

玉泓庄之宴夜深始罷巴水東流江雲暮結斯亦第五橋皇子陂矣不佞被酒始得解携十觴不覺醉感子故意長浣花翁語也乃今謂我耶佳稿返上中間稍拔其尤是以管窺豹祇見一斑耳拙序梓成多惠數部藏之江閣傳諸其人

報張漸江方伯書

不佞追隨門下忽幾半載門下與而進之提挈

見于訓辭綢繆結乎尊酒心照神孚不啻影響真知交之款密而浮生之殊遇也郎君文奇甚茲附一摺并以圭兒拙作請正交驩當世講矣門下以爲何如造次布悃容前途修謝

報杜與齋府丞書

不佞往附明公榜末荷聲氣之同久矣嗣視學三川明公有彈冠之慶而不佞爲悅已之容三度閬中辱明公愛甚驩也近過精舍乃明公旌節遠在金陵徘徊錦屏山畔花容鳥語佳麗可

人如見明公顏色公子靜養高奮有期殊慰鄙
懷不佞叨轉八閩將離明公梓里不勝眷然之
懷謹專人馳候拜別公子

報謝鳳渚僉憲書

往明公剖符穎上才名政聲燁然江左真爲萬
物吐氣不佞私心仰之恨不一見台光然亦萍
水之逢耳乃明公感舊高誼惓惓不置勿論平
時荷愛倍于曹偶即玉泓庄之宴道遠夜深矣
酒酣耳熱三雅而別至不能出一語古店再晤

宛如夢寐乃知潭水插花青山芳草昔人重別
良有以也明公德澤洪茂西川安堵鱗鴻倘便
各努力相聞

報周近松憲副書

門下溫純特達親之者如探玉環惟恐其盡乃
江陽之政光照千里豈真所稱吐珠于澤誰能
不含者耶漢臯隋和自古記之矣李本寧兄寓
書惓惓詢門下起居倘有書致京源幸道不佞
轉聞之情不佞入蜀數月厯厯一晤然聲應氣

三酉園尺牘 卷之七
求如在左右閩海逖矣悵如之何且罪積巴山
知門下必覆蓋之瓶之罄矣惟壘之耻願高明
少留意焉茲當離蜀造次布悃暮雲春樹不勝
眷然之感

報劉小泉憲副書

門下以弇州視郢上以故人視不佞平時愛雅
夜來尊酒翩翩乎薄玉壘而上之矣家兄文炳
事辱門下生全已父乃徐侍御公書惓惓于去
任之日在不佞抱關弓涕泣之感而明公切披
髮纓冠之救矣此其高誼不世世銘刻哉茲當
去蜀敬此鳴謝容至里門專候不宣

五嶽山人尺牘卷之七



